

VENDIM
Nr. 101, datë 15.12.2020

AUTORIZIM I NDIHMËS SHTETËRORE “PËR FUQIZIMIN E TË RINJVE DHE TË TË REJAVE”

Komisioni i Ndihmës Shtetërore, me pjesëmarrjen e:

- | | |
|-----------------------|-----------|
| - znj. Anila Denaj | kryetare; |
| - znj. Mimoza Dhëmbi | anëtare; |
| - znj. Etleva Haka | anëtare; |
| - znj. Mirjana Zisi | anëtare. |
| - z. Ahmet Mançellari | anëtar, |

në mbledhjen e tij të radhës të datës 15.12.2020, në Ministrinë e Financave dhe Ekonomisë, në bazë të ligjit nr. 9374, datë 21.4.2005, “Për ndihmën shtetërore”, të ndryshuar, dhe të vendimit të Këshillit të Ministrave nr. 817, datë 28.12.2005, “Për miratimin e rregullores ‘Për procedurat dhe formën e njoftimit’”, mori në shqyrtim njoftimin e Bashkisë Tiranë lidhur me planin e dhënies së ndihmës shtetërore për fuqizimin e të rinjve dhe të të rejave.

I. Procedura

1. Bashkia Tiranë, me shkresën nr. 42363, datë 2.12.2020, në bazë të nenit 20, të ligjit nr. 9374, datë 21.4.2005, “Për ndihmën shtetërore”, të ndryshuar njoftoi në Komisionin e Ndihmës Shtetërore planin e ndihmës shtetërore të sipërpërmendur, në hartuar në draftudhëzuesit operacionalë të projektit “Fuqizimi i të rinjve dhe i të rejave”, i cili do të miratohet me vendim të Këshillit Bashkiak.

II. Përshkrimi i masës

2. Objektivi: Plani i ndihmës ka si objektiv mbështetjen me grante të të rinjve dhe të të rejave të prekur nga pasojat e shkaktuara nga tërmetet që ndodhen në Shqipëri në datat 21 shtator dhe 26 nëntor 2019, si edhe pandemisë globale të shkaktuar nga COVID-19. Skema synon ngritjen e një sipërmarrjeje të qëndrueshme private, duke gjeneruar vende të lira pune dhe duke mundësuar trajnime për hartimin e planit të biznesit.

3. Baza ligjore dhe vlera e ndihmës: Plani i ndihmës shtetërore është e hartuar nëpërmjet draftudhëzuesit operacional të projektit “Fuqizimi i të rinjve dhe i të rejave”, i cili do të miratohet me vendim të Këshillit Bashkiak Tiranë. Ndihma do të jepet në formën e grantit në vlerën 16.000.000 lekë. Çdo përfitues do të mbështetet me grant të drejtpërdrejtë në shumën 800,000 lekë. Intensiteti i ndihmës do të jetë 80% e kostove të pranueshme.

4. Kohëzgjatja: Plani i ndihmës do të zbatohet në vitin 2021.

5. Dhënësi i ndihmës dhe autoriteti përgjegjës për zbatimin e masës është Bashkia e Tiranës.

6. Përfituesit: Përfitues janë ndërmarrje mikro që do të ushtrojnë veprimtarinë ekonomike në territorin e Bashkisë së Tiranës, në sektorët e teknologjisë së informacionit dhe të komunikimit (TIC), agrobujqësisë etj. dhe ndërmarrje që ofrojnë shërbime në treg, duke synuar mbështetjen me grante deri në 20 ndërmarrje.

7. Shtrirja territoriale: Projekti do të zbatohet në territorin e Bashkisë së Tiranës.

III. Vlerësimi i ekzistencës së ndihmës shtetërore

8. Komisioni i Ndihmës Shtetërore vlerëson nëse plani i ndihmës shtetërore për fuqizimin e të rinjve dhe të të rejave, përbën ndihmë shtetërore në kuptim të nenit 4, pika 1 e ligjit nr. 9374, datë 21.04.2005 “Për ndihmën shtetërore”, të ndryshuar, pra, nëse plani ofron një avantazh ekonomik për ndërmarrje; ka ndikim potencial në konkurrencë dhe tregti në rajon; që nuk do të ishte përfituar në kushte normale të tregut.

9. Neni 4, pika 1, e ligjit nr. 9374, datë 21.4.2005, “Për ndihmën shtetërore”, të ndryshuar, përcakton se:

“Përveç rasteve të parashikuara ndryshe në këtë ligj, ndalohet çdo ndihmë e dhënë nga burimet shtetërore, në çfarëdolloj forme e cila, në mënyrë të drejtpërdrejtë ose të tërthortë, shtrembëron ose kërcënon të shtrembërojë konkurrencën, duke dhënë përparësi për një ose disa ndërmarrje të caktuara ose për prodhimin e produkteve të caktuara, për aq sa mund të ketë ndikim në plotësimin e detyrimeve të ndërmarrja nga Republika e Shqipërisë në marrëveshjet ndërkombëtare që përmbajnë dispozita të ndihmës shtetërore.”.

10. Gjithashtu, neni 71 “Konkurrenca dhe dispozita të tjera ekonomike”, i Marrëveshjes së Stabilizim-Asociimit ndërmjet Komuniteteve Evropiane e shteteve të tyre anëtare dhe Republikës së Shqipërisë¹, përcakton se:

“Praktikat në kundërshtim me këtë nen vlerësohen në bazë të kriterëve që lindin nga zbatimi i rregullave të konkurrencës së aplikueshme në Komunitet, sidomos në nenet 81, 82, 86 dhe 87 të Traktatit Themelues të Komunitetit Evropian dhe instrumenteve interpretuese që përdoren nga institucionet e Komunitetit.”.

11. Sa më lart, ligji i ndihmës shtetërore zbatohet vetëm për masat që plotësojnë të gjitha kriteret e përmendura në nenin 4, pika 1, më konkretisht: a) burime shtetërore; b) avantazhi ekonomik; c) selektiviteti; dhe d) efekti në konkurrencë dhe treg.

12. Plani i njoftuar i ndihmës shtetërore lidhet me aktivizimin e burimeve shtetërore në formën e granteve për mbështetjen e 20 ndërmarrjeve mikro. Plani i ndihmës është selektive, pasi Komisioni i Vlerësimit të Grantit do të përzgjedhë aplikantët përfitues, në bazë të kriterëve të përcaktuara në draftudhëzues; synon mbështetjen e sektorëve të përmendur në pikën 6 të këtij vendimi; ka efekt në konkurrencë dhe në tregti; dhe jep një avantazh ekonomik kundrejt ndërmarrjeve ekzistuese në treg, sepse plani synon të mbështesë krijimin ose zgjerimin e aktiviteteve të zbatueshme të ndërmarrjeve nga të rinjtë, të aftë për të pasur sukses në një treg konkurrues dhe shmangien e falimentimit të ndërmarrjet ekzistuese në treg.

Në këto kushte, Komisioni vlerëson se plani i njoftuar është ndihmë shtetërore.

IV. Vlerësimi i përputhshmërisë së skemës

13. Komisioni i Ndhmës Shtetërore vlerëson skemën e njoftuar në përputhje me nenin 11, të VKM-së nr. 513, datë 4.9.2018, “Për miratimin e rregullores ‘Për kushtet dhe procedurat e dhënies dhe autorizimit të disa kategorive të ndihmës shtetërore’”, pasi skema e njoftuar e ndihmës shtetërore përmbush, si më poshtë:

- Mbulon kostot e pranueshme si vijon:

a) kostot e investimit në asete të prekshme dhe të paprekshme;

b) kostot e parashikuara të pagave, në lidhje me punësimin e krijuar drejtpërsëdrejti nga projekti i investimit, të përlllogaritura gjatë një periudhë dyvjeçare.

- Investimi do të konsiderohet si kosto e pranueshme, pra në asete të prekshme dhe/ose të paprekshme për ngritjen e një ndërmarrjeje të re apo zgjerimin e një ndërmarrjeje ekzistuese, për të diversifikuar prodhimin e një ndërmarrjeje me produkte të reja shtesë ose një ndryshim rrënjësor në procesin e përgjithshëm të prodhimit të një ndërmarrjeje ekzistuese.

- Vendet e punës të jenë të krijuara në mënyrë të drejtpërdrejtë nga projekti i investimit.

Sa më lart, Komisioni vlerëson se plani i ndihmës shtetërore është i lejueshëm dhe në përputhje me nenin 4, dhe 8/1, të ligjit nr. 9374, datë 21.4.2005, “Për ndihmën shtetërore”, të ndryshuar.

PËR KËTO ARSYE:

¹ Ligji nr. 9590, datë 27.7.2006, “Për ratifikimin e ‘Marrëveshjes së stabilizim-asociimit ndërmjet Republikës së Shqipërisë dhe komuniteteve evropiane e shteteve të tyre anëtare’”.

Komisioni i Ndhmës Shtetërore, në bazë të neneve 4, 8/1, 17, 22 dhe 31 të ligjit nr. 9374, datë 21.4.2005, “Për ndihmën shtetërore”, të ndryshuar,

VENDOSI:

1. Të autorizojë zbatimin e planit të ndihmës shtetërore në formën e grantit për ndërmarrjet mikro, të parashikuar në draftudhëzuesin operacional të projektit “Fuqizimi i të rinjve dhe i të rejave”.
2. Bashkia e Tiranës, në zbatimin e planit të ndihmës shtetërore të raportojë në Komisionin e Ndhmës Shtetërore mbi efektin nxitës dhe domosdoshmërinë e ndihmës.
3. Bashkia e Tiranës, brenda datës 31 mars të çdo viti, të paraqesë raport për impaktin e ndihmës shtetërore gjatë vitit paraardhës financiar. Raportet e zbatimit duhet të përmbajnë informacion të detajuar mbi shpenzimet e kryera dhe rezultatet e arritura.
4. Të gjitha të dhënat për zbatimin e plani të ndihmës të ruhen deri në dhjetë vjet, pasi ndihma e fundit individuale të jetë dhënë në kuadër të këtij plani.
5. Ky vendim të botohet në Fletoren Zyrtare.

KRYETAR
Anila Denaj